



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr. , datë . 2017

PËR

**“RREGULLAT PËR SHKËMBIMIN E GRUPEVE DHE SHËRBIMEVE TË TË
DHËNAVE GJEOHAPËSINORE MES AUTORITETEVE PUBLIKE”**

Në mbështetje të nenit 100 të Kushtetutës dhe pikës 3 të nenit 19, të ligjit nr. 72/2012, “Për Organizimin dhe Funksonimin e Infrastrukturës Kombëtare të Informacionit Gjeohapësinor në Republikën e Shqipërisë”, me propozimin e Ministrit të Shtetit për Inovacionin dhe Administratën Publike, Këshilli i Ministrave

VENDOSI:

I. RREGULLA TË PËRGJITHSHME

1. Bazuar në nenin 19 të ligjit 72/2012 autoritetet publike shkëmbejnë mes tyre grupet dhe shërbimet e të dhënave gjeohapësinore që kanë në administrim vetëm për qëllime të realizimit të funksioneve të tyre publike.
2. Për të dhënat gjeohapësinore që janë bërë pjesë e GIS-it Kombëtar dhe janë publikuar në Gjeoportalin Kombëtar shkëmbimi do të bëhet nëpërmjet përdorimit të shërbimeve të rrjetit të këtij gjeoportali, sipas përcaktimeve të kreut II.
3. Për të dhënat gjeohapësinore që nuk janë publikuar në Gjeoportalin Kombëtar, deri në momentin e publikimit, shkëmbimi do të bëhet sipas përcaktimeve në kreun III.
4. Në asnjë rast të dhënat apo grupet e të dhënave gjeohapësinore të marra me qëllim realizimin e funksioneve publike nuk mund të përdoren për qëllime të tjera, apo t’u vihen në dispozicion të tretëve, me përjashtim të ASIG-ut.
5. Refuzimi për të venë në dispozicion informacion gjeohapësinor në cdo rast duhet të jetë i argumentuar dhe bëhet objekt i shqyrtimit në Bordin për Informacionin Gjeohapësinor (BIG).
6. Kufizimet për shkëmbimin e informacionit gjeohapësinor, për cdo rast, bëhen me vendim të ASIG-ut, dhe vetëm për shkaqet e parashikuara në pikën 2 të nenit 19 të ligjit 72/2012.

II. MARRJA E INFORMACIONIT NGA GJEOPORTALI KOMBËTAR NËPËRMJET SHËRBIMEVE TË RRJETIT (SHKARKIMI I TË DHËNAVE)

1. Autoriteti Shtetëror për Informacionin Gjeohapësinor (ASIG), në bazë të nenit 23 të ligjit nr. 72/2012 “Për organizimin dhe funksionimin e Infrastrukturës Kombëtare të Informacionit Gjeohapësinor në Republikën e Shqipërisë”, ofron për të gjithë përdoruesit shërbimet e rrjetit për aksesin në informacionin gjeohapësinor.
2. Për autoritetet publike që përdorin informacion gjeohapësinor për të realizuar funksionet e tyre publike ky informacion ofrohet pa pagesë.
3. Aksesi për Shërbimin e Shkarkimit (shkëmbimin e të dhënave) për autoritetet publike ofrohet nëpërmjet Gjeoportalit Kombëtar pas pajisjes së autoritetit publik me kredencialet e nevojshme (username, password)
4. Pajisja e autoritetit publik me kredencialet e nevojshme, nga ana ASIG, bëhet vetëm pas kërkesës zyrtare me shkrim dhe përcaktimit prej tij të personit/ave përgjegjës.
5. Pasi analizohet kërkesa, Drejtori i Përgjithshëm i ASIG, autorizon administratorin e sistemit për pajisjen e personave të autorizuar të autoritetit publik me kredencialet e nevojshme dhe lejen për të përdorur shërbimin e shkarkimit.
6. Llogaria e hapur në emër të autoritetit publik i dërgohen zyrtarisht institucionit.
7. Marrja e informacionit për çdo rast, realizohet në mënyrë automatike nga sistemi, pas plotësimit të fushave të nevojshme, të përcaktuara në manualin e hartuar dhe publikuar nga ASIG në Gjeoportalin Kombëtar.
8. Arsyetimi i kërkesës, bazuar në nevojën për kryerjen e funksioneve publike të institucionit, është kërkesë e detyrueshme pa plotësimin e së cilës nuk mundësohet marrja e informacionit.
9. Lejimi për shkarkimin e informacionit apo refuzimi i tij i shkojnë autoritetit publik (kërkuesit) me e-mail duke i dhënë edhe linkun e shërbimit të shkarkimit në rastin e pranimit të kërkesës dhe arsyen e moslejimit të shkarkimit në rastin e refuzimit.

III. MARRJA E INFORMACIONIT, NGA AUTORITETI PUBLIK QË E ZOTËRON, NËPËRMJET KËRKESËS ME SHKRIM RAST PAS RASTI.

1. Për të dhënat gjeohapësinore që nuk janë publikuar në Gjeoportalin Kombëtar, i paraqitet kërkesë e argumentuar, me shkrim, autoritetit publik që i zotëron ato.
2. Në cdo rast kërkesa i dërgohet për dijeni ASIG-ut, si autoritet kombëtar përgjegjës për informacionin gjeohapësinor.
3. Arsyetimi i kërkesës, bazuar në nevojën për kryerjen e funksioneve publike të institucionit, është kërkesë e detyrueshme pa plotësimin e së cilës nuk mundësohet marrja e informacionit.

4. Autoriteti publik të cilit i është drejtuar kërkesa, vë në dispozicion të kërkuarit dhe të ASIG-ut, të dhënat gjeohapësinore, duke përfshirë edhe metadatën përkatëse, brenda afateve të parashikuara në kuadrin ligjor në fuqi.
5. Në rastin e refuzimit të kërkesës, për të venë në dispozicion informacion gjeohapësinor, autoriteti publik që e zotëron atë duhet të arsyetojë refuzimin.

Ky vendim hyn në fuqi pas botimit në Fletoren Zyrtare.

K R Y E M I N I S T R I

EDI RAMA